



30 November 2021
30 November 2021
P.U. (A) 433

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN PILIHAN RAYA (PENDAFTARAN PEMILIH) (PINDAAN) 2021

ELECTIONS (REGISTRATION OF ELECTORS) (AMENDMENT) REGULATIONS 2021

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA PILIHAN RAYA 1958

PERATURAN-PERATURAN PILIHAN RAYA (PENDAFTARAN PEMILIH) (PINDAAN) 2021

PADA menjalankan kuasa yang diberikan oleh seksyen 15 Akta Pilihan Raya 1958 [*Akta 19*], Suruhanjaya Pilihan Raya, dengan kelulusan Yang di-Pertuan Agong, membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Pilihan Raya (Pendaftaran Pemilih) (Pindaan) 2021**.

(2) Peraturan-Peraturan ini mula berkuat kuasa pada 15 Disember 2021.

Pindaan peraturan 2

2. Peraturan-Peraturan Pilihan Raya (Pendaftaran Pemilih) 2002 [*P.U. (A) 293/2002*], yang disebut “Peraturan-Peraturan ibu” dalam Peraturan-Peraturan ini, dipinda dalam peraturan 2, dalam takrif “pengundi tidak hadir”, dengan menggantikan perkataan “dua puluh satu tahun” dengan perkataan “lapan belas tahun”.

Pindaan peraturan 6

3. Subperaturan 6(2) Peraturan-Peraturan ibu dipinda—

(a) dengan menggantikan perkataan “Pasukan Simpanan Sukarela” dengan perkataan “Pasukan Polis Sukarelawan”; dan

(b) dengan menggantikan perkataan “pengundi pos” di mana-mana jua terdapat dengan perkataan “pengundi awal”.

Pindaan peraturan 10

4. Peraturan 10 Peraturan-Peraturan ibu dipinda—

(a) dalam subperaturan (2)—

(i) dengan menggantikan perkataan “Pendaftar” di mana-mana jua terdapat dengan perkataan “Ketua Pendaftar”; dan

(ii) dengan menggantikan perkataan “tiap-tiap tiga bulan” dengan perkataan “tiap-tiap bulan”; dan

(b) dengan memasukkan selepas subperaturan (2) subperaturan yang berikut:

“(3) Dalam mengemaskinikan daftar pemilih induk di bawah subperaturan (2), Ketua Pendaftar boleh—

(a) mengarahkan Pendaftar atau mana-mana orang yang dilantik olehnya secara bertulis untuk membuat siasatan dari rumah ke rumah atau siasatan lain sebagaimana yang difikirkannya perlu; atau

(b) sama ada olehnya sendiri atau melalui Pendaftar bagi maksud itu, menghantar suatu notis yang menghendaki maklumat kepada orang yang daripadanya maklumat itu dikehendaki dengan cara pos biasa yang dialamatkan kepada orang itu atau dengan menyampaikan notis itu kepada orang itu sendiri atau kepada seseorang anggota isi rumahnya yang dewasa.

(4) Jika mana-mana orang yang daripadanya maklumat itu dikehendaki tidak memberikan maklumat itu kepada Ketua Pendaftar atau Pendaftar dalam masa tujuh hari selepas notis di bawah perenggan (3)(b) disampaikan kepadanya oleh Ketua Pendaftar atau

Pendaftar, maka selain apa-apa penalti yang ditetapkan oleh mana-mana undang-undang bertulis, namanya hendaklah dipotong daripada daftar pemilih induk sekiranya dia berdaftar sebagai pemilih.

(5) Pendaftar dan tiap-tiap orang yang dilantik oleh Ketua Pendaftar di bawah perenggan (3)(a) yang kepadanya telah diberikan apa-apa maklumat atau yang olehnya maklumat itu dikumpulkan di bawah peraturan ini hendaklah dengan serta-merta memberikan maklumat itu kepada Ketua Pendaftar.”.

Penggantian peraturan 12

5. Peraturan-Peraturan itu dipinda dengan menggantikan peraturan 12 dengan peraturan yang berikut:

“Pendaftaran pemilih

12. (1) Pendaftar hendaklah mendaftar—

(a) tiap-tiap orang yang berkelayakan untuk didaftarkan sebagai seorang pemilih Parlimen di dalam mana-mana Negeri; dan

(b) tiap-tiap orang yang berkelayakan untuk didaftarkan sebagai seorang pemilih Negeri di dalam Negeri itu,

dan yang belum didaftarkan sedemikian di bawah Peraturan-Peraturan ini sebagai pemilih bagi suatu kawasan pendaftaran.

(2) Bagi maksud pendaftaran seseorang pemilih bagi suatu kawasan pendaftaran di bawah subperaturan (1), Pendaftar hendaklah memuaskan hatinya tentang kecukupan maklumat berhubung dengan—

(a) status kewarganegaraan, nama penuh, nombor kad pengenalan dan alamat kediaman pemilih

dan apa-apa maklumat lain mengenai pemilih, yang diperoleh daripada jabatan yang dipertanggungjawabkan dengan tanggungjawab yang berhubungan dengan hal ehwal pendaftaran warganegara Malaysia; dan

(b) status kehilangan kelayakan pemilih yang boleh diminta oleh Pendaftar daripada mana-mana agensi Kerajaan Persekutuan yang berkaitan.”.

Peraturan baharu 12A

6. Peraturan-Peraturan ibu dipinda dengan memasukkan selepas peraturan 12 peraturan yang berikut:

“Permohonan bagi pemindahan pendaftaran

12A. (1) Mana-mana orang yang telah didaftarkan sebagai pemilih dan berhasrat untuk memindahkan pendaftarannya ke suatu tempat yang lain yang dia layak untuk didaftarkan, hendaklah memohon kepada mana-mana Pendaftar bagi mana-mana kawasan pendaftaran atau mana-mana Penolong Pendaftar bagi mana-mana unit pendaftaran.

(2) Permohonan di bawah subperaturan (1) hendaklah dibuat dalam Borang A dalam Jadual dan hanya boleh dibuat sekali bagi setiap pemerakuan daftar pemilih tambahan.”.

Pindaan peraturan 13

7. Peraturan 13 Peraturan-Peraturan ibu dipinda—

(a) dalam subperaturan (1), dengan menggantikan perkataan “sekali dalam tiap-tiap tiga bulan” dengan perkataan “sekali dalam sebulan”;

(b) dengan menggantikan subperaturan (5) dengan subperaturan yang berikut: